



# PREZIDÊNCIA KONSELLU MINISTRUS

VIII GOVERNUN KONSTITUSIONÁL

## KOMUNIKADU IMPRENSA

### **Sorumutuk Konsellu Ministrus nian iha loron 26 fulan-setembru tinan 2018**

Konsellu Ministrus hala'o sorumutuk iha Palásiu Governu, iha Dili, no analiza ona apresentasaun husi Ministru Estadu Prezidénsia Konsellu Ministrus, Agio Perreira, ne'ebé liga ba pontu situasaun kona-ba negosiasaun atu rezolve kestaun téknika sira ba ratifikasaun Tratadu Tasi Timor nian.

Membru Governu sira diskute kestaun sira ne'ebé relasiona ho orsamentu Estadu nian ba tinan 2019, hafoin, iha semana liubá halo aprovasaun ba limite másimu husi orsamentu ne'e no distribuissau envelope fiskál liña ministeriál hotu-hotu nian ne'ebé maka horiseik Ministériu Finansas halo ona . Ministra Finansas iha ezersísiu, Sara Lobo Brites, husu ba Ministériu hotu-hotu atu respeita limite másimu ne'ebé hetan ona aprovasaun ne'e bainhira halo planu kona-ba orsamentu Ministériu ida-idak nian.

Konsellu Ministrus debate ona mós kona-ba difikuldade sira ne'ebé mosu tanba rejime duodésimu, liuliu situasaun difisil kona-ba fornimentu kombustivel ba eletrisidade, tanba orsamentu ba tinan fiskál 2018 nian ne'e sei hein hela promulgasaun husi Prezidente Repúblika, Francisco Guterres Lú Olo.

Ikusliu, Ministru Reforma Lejizlativa no Asuntus Parlamentares, Fidelis Magalhães, apresenta mós ba Konsellu Ministrus informasaun no rezultadu sira husi Assembleia Jerál BNCTL nian, ne'ebé Estadu maka sai hanesan asionista. Apresenta ona lukru ne'ebé BNCTL hetan iha tinan 2017 no avalia mós proposta kona-ba kapitalizasaun Banku ne'e nian atu aumenta tan ninia kapitál, atu nune'e BNCTL bele prontu atu hasoru situasaun finanseira saida de'it no bele habelar liután ninia produktu sira, hodi nune'e sai atrativu liután ba populasau. Iha sorumutuk ne'e, halo mós debate kona-ba proposta atu fó ba BNCTL, sasán imovel Estadu nian hirak ne'ebé maka



Palácio do Governo,  
Avenida Presidente Nicolau Lobato,  
Dili, Timor-Leste

pcm.gov.tl@mail.com  
(+670) 33 310 608

oras ne'e daudaun Banku utiliza hela, atu sasán sira-ne'e bele sai-hanesan patrimóniu BNCTL nian. **REMATA**



Palácio do Governo,  
Avenida Presidente Nicolau Lobato,  
Dili, Timor-Leste

[pcm.gov.tl@mail.com](mailto:pcm.gov.tl@mail.com)  
(+670) 33 310 608